

四庫全書

史部

欽定四庫全書

欽定續通志卷二百六十六

列傳

唐 六十六

竇羣

李逢吉

劉栖楚

張又新

元稹

牛僧孺

蔚黃 廉

李宗閔

楊嗣復

拔損

楊虞卿

漢公 汝士

張宿

熊望

相者

竇羣字丹列京兆金城人

集舊書作扶風平陵人

父叔向代宗時

位左拾遺羣兄弟皆擢進士第獨羣以處士客毗陵母

卒廬墓次終喪從廬底傳啖助春秋學著書數十篇以

韋夏卿薦德宗擢為左拾遺王叔文黨盛雅不喜羣羣

亦悻悻不肯附欲逐之韋執誼不可乃止憲宗立轉膳

部員外郎兼侍御史知雜事出為唐州刺史節度使于

頤聞其名與語奇之表以自副武元衡李吉甫皆所厚

善故召拜吏部郎中元衡輔政薦羣代為中丞羣引呂

溫羊士謬為御史吉甫以二人躁險持不下羣收狼反
怨吉甫吉甫節度淮南羣謂失恩因擠之陳登者善術
夜過吉甫家羣即捕登掠考上言吉甫陰事憲宗面覆
登得其情大怒將誅羣吉甫為救解乃免出為湖南觀
察使改黔中會水壞城郭調谿洞羣蠻築作因是羣蠻
亂貶開州刺史稍遷容管經畧使召還卒于行年五十
五

樂舊書卒
年五十

贈左散騎常侍兄常牟弟庠羣皆為郎

工詞章為聯珠集行於時

李逢吉字虛舟系出隴西舉明經又擢進士第范希朝表為振武掌書記薦之德宗拜左拾遺憲宗時遷給事中皇太子侍讀改中書舍人知禮部貢舉未已事拜門下侍郎同中書門下平章事詔禮部尚書王播署榜逢吉性忌刻險譎多端及得位務備好惡裴度討淮西逢吉慮成功密圖沮止趣和議者請罷諸道兵憲宗知而惡之出為劔南東川節度使穆宗即位徙山南東道緣講侍恩陰結近倖長慶二年召入為兵部尚書時度與

元稹知政度嘗條稹愆佞逢吉以為其隙易乘遂并中
之遣人上變言和王傳于方結客欲為稹刺度帝命尚
書左僕射韓皋給事中鄭覃與逢吉參鞠方無狀稹度
坐是皆罷逢吉代為門下侍郎平章事進尚書右僕射
帝暴疾中外阻遏逢吉因中人梁守謙劉弘規王守澄
議請立景王為皇太子帝不能言領之而已明日下詔
皇太子遂定鄭注得幸於王守澄逢吉遣從子訓賂注
結守澄為與授

集訓傳逢吉使訓賂注守澄自在太和
六七年間而此傳次之貳昭前與訓

傳子指稿
書亦然

自是肆志無所憚其黨有張又新李績張權

興劉栖楚李虞程昔範姜洽及訓八人而傳會者又八
人皆任要劇故號八闕十六子有所求請先賂關子後
達於逢吉無不得所欲未幾封涼國公敬宗新立度求
入覲逢吉不自安張權興為作讖言以沮度而韋處厚
亟為帝言之計不行于是興武昭獄以止度入武昭者
度討蔡時所遣說吳元濟者也除石州刺史罷歸不得
用怨望與太學博士李涉金吾兵曹參軍茅彙居長安

中以氣俠相許逢吉與李程同執政不叶程族人仍叔
謂昭曰丞相欲用君顧逢吉持不可昭愈憤酒所語其
友劉審欲刺逢吉審竊語權輿逢吉因彙召見昭厚相
結納忿隙得解及是昭彙皆下獄命御史中丞王播按
之訓諷彙使誣昭與李程同謀不然且死彙不可曰誣
人以自免不為也獄成昭榜死彙流崖州涉康州仍叔
貶道州司馬訓流象州擢審長壽主簿而逢吉謀益露
天子知度忠卒相之逢吉於是寢跡以檢校司空平章

事為山南東道節度使久乃徙宣武以太子太師為東都留守及訓用事召拜尚書左僕射足病不能朝以司徒致仕卒年七十八贈太尉謚曰成無子以從弟子植

嗣

劉栖楚其出寒鄙為鎮州小史王承宗奇之薦於李逢吉繇鄆州司倉參軍擢右拾遺逢吉之罷裴度逐李紳皆嫉而為奸者敬宗立視朝常晏數游畋失德栖楚叩頭極諫血被面李逢吉傳詔毋叩頭待詔旨栖楚捧首

立帝動容揚袂使去栖楚曰不聽臣言臣請死于此有
詔慰諭乃出遷起居郎辟疾歸洛後諫官對延英帝問
向廷爭者在邪以諫議大夫召未幾宣授刑部侍郎故
事侍郎無宣授者逢吉喜助已故不次任之數月改京
兆尹峻誅罰不避權豪先是諸惡少竄名北軍凌藉衣
冠有罪則逃軍中無敢捕栖楚一切窮治不閤旬宿姦
老蠹為斂迹一日軍士乘醉有所凌突諸少年從旁譟
曰癡男子不記頭上尹邪然其性詭激敢為怪行乘險

抵牾若無顧藉內實恃權怙寵以干進詣宰相厲色慢辭韋處厚惡之出為桂管觀察使卒贈左散騎常侍

張又新字孔昭工部侍郎薦之于元和中及進士高第歷左右補闕性傾邪李逢吉用事惡李紳冀得其罪求中朝凶果敢言者厚之以危中紳又新與拾遺李續劉栖楚等為逢吉搏吠所憎故有八關十六子之目敬宗立紳貶端州司馬朝臣過宰相賀閭者曰止宰相方與補闕語姑伺之及又新出流汗揖百官曰端溪之事竊

不敢讓人皆辟易畏之尋轉祠部員外郎及逢吉罷領
山南東道節度表又新為行軍司馬坐田伍事貶汀州
刺史李訓有寵又新復見用遷刑部郎中為申州刺史
訓死復坐貶終左司郎中又新善文辭再以諂附貶喪
其家聲云

元稹字微之河南人六代祖巖為隋兵部尚書稹幼孤
母鄭賢而文親授書傳九歲工屬文十五擢明經既以
判入等補校書郎元和元年舉制科對策第一拜左拾

遺性明銳遇事輒舉始王叔文王伾掌幸太子宮而橈國政稔謂宜選正人輔導因條上十事一教太子正邦本二封諸王固磐石三出宮人四嫁宗女五時召宰相講庶政六次對羣臣廣聰明七復正衙奏事八許方幅糾彈九禁非時貢獻十省出入畋游又陳西北邊事憲宗悅召問得失當路者惡之出為河南尉以母喪解服除拜監察御史按獄東川因劾奏節度使嚴礪違詔過賦數百萬沒入塗山甫等八十餘家田產奴婢時礪已

死七刺史皆奪俸礪黨怒俄分司東都時浙西觀察使
韓臯杖安吉令孫泚數日死武寧王紹護送監軍孟昇
喪乘驛內喪郵中吏不敢止內園擅繫人踰年臺不及
知河南尹誣殺諸生尹太階飛龍使誘亡命奴為養子
田季安盜取洛陽衣冠女汴州沒入死賈錢千萬几十
餘事悉論奏會河南尹房式坐罪植舉劾按故事追攝
移書停務詔薄式罪名植還次數水驛中人仇士良
書作內官劉士元未知孰是夜至植不讓中人怒擊植敗面宰相以

稹年少輕樹威失憲臣體貶江陵士曹參軍而李絳崔
羣白居易皆論其枉久乃徙通州司馬改虢州長史元
和未召拜膳部員外郎稹尤長於詩與居易名相埒天
下傳諷號元和體往往播樂府穆宗在東宮妃嬪近習
皆誦之宮中呼元才子稹之謫江陵善監軍崔潭峻長
慶初潭峻方親幸以稹歌詞數十百篇奏御帝大悅即
擢祠部郎中知制誥變詔書體務純厚明切盛傳一時
然其進非公議為士類訾薄俄遷中書舍人翰林承旨

學士數召入禮遇益厚自謂得言天下事中人爭與植
交魏弘簡在樞密尤相善裴度出屯鎮州有所論奏其
沮卻之度三上疏劾弘簡植傾亂國政陛下欲平賊當
先清朝廷帝迫羣議乃罷弘簡而出植為工部侍郎然
眷倚不衰未幾進同中書門下平章事植思立奇節報
天子以厭人心時王廷湊方圍牛元翼於深州植所善
于方言王昭于友明按于友明舊書本傳及植
至同州謝表皆作王友明皆豪士
雅游燕趙間能得賊要領可使反間而出元翼願以家

贊辦行得兵部虛告二十以便募士稹然之李逢吉
知其謀陰令李賞誅裴度曰于方為稹結客將刺公度
隱不發神策軍中尉以聞詔韓臯鄭覃及逢吉雜治無
刺度狀而方計暴聞遂與度偕罷宰相出為同州刺史
諫官爭言度不當免而黜稹輕帝獨憐稹但削長春宮
使再暮徙浙東觀察使太和三年召為尚書左丞務振
綱紀出郎官尤無狀者七人然稹素無檢望輕不為公
議所石王播卒謀復輔政甚力訖不遂俄拜武昌節度

使卒年五十三贈尚書右僕射

牛僧孺字思黯隋僕射奇章公弘之裔工屬文第進士
元和初以賢良方正對策與李宗閔皇甫湜俱第一條
指失政其言體訐不避宰相宰相怒故楊於陵鄭敬韋
貫之李益等坐考非其宜皆調去僧孺調伊闕尉改河
南遷監察御史累進考功員外郎集賢殿直學士穆宗
初以庫部郎中知制誥徙御史中丞按治不法內外澄
肅宿州刺史李直臣坐賕當死賂宦侍為助欲貸而用

之僧孺持不可乃止賜金紫服以戶部侍郎同中書門下平章事始韓弘入朝其子公武用財賂權貴杜塞言者俄而弘公武卒孫弱不能事帝遣使者至其家悉收箚簿校計出入所以餉中朝臣者皆在至僧孺獨注其左曰某月日送錢千萬不納帝善之謂左右曰吾不謬知人繇是遂以相尋遷中書侍郎敬宗立進封奇章郡公是時政出近倖僧孺數表去位帝乃於鄂州置武昌軍授武昌節度使同平章事鄂城土惡亟圮歲增築僧

孺陶覽以城五年畢鄂人無復歲費文宗立李宗閔當
國屢稱僧孺賢不宜棄外復以兵部尚書平章事幽州
亂楊志誠逐李載義帝召宰相問計僧孺曰第付以節
使扞奚契丹彼且自力不足以逆順治也帝因遣使慰
撫之進門下侍郎弘文館大學士是時吐蕃請和約弛
兵而大酋悉怛謀舉維州入之劔南於是李德裕上言
韋臯經略西山至死恨不能致今以生羌二千人燒十
三橋擣虜之虛可以得志帝使羣臣大議請如德裕策

僧孺持不可遂詔返降者時皆謂僧孺挾素怨橫議沮解之帝亦以為不直會中尉王守澄引織人竊議朝政它日延英召見宰相曰公等有意於太平乎何道以致之僧孺曰臣待罪宰相不能康濟然太平亦無家今四夷不內擾百姓安生業私室無疆家上不壅蔽下不怨讟雖未及至盛亦足為治矣而更求太平非臣所及退謂它宰相曰上責成如是吾可久處此耶固請罷乃檢校尚書左僕射平章事為淮南節度副大使天子既急

於治故李訓等投隙得售其妄開成初表解劇鎮以檢校司空為東都留守三年召為尚書左僕射以足疾不任謁檢校司空平章事為山南東道節度使會昌元年漢水溢壞城郭坐不謹防下遷太子少保進少師明年以太子太傅留守東都劉稹誅事連僧孺武宗怒黜為太子少保分司東都累貶循州長史宣宗立徙衡汝二州還為太子少師卒贈太尉年六十九謚曰文簡諸子蔚叢最顯

蔚字大章少擢兩經又第進士繇監察御史為右補闕
大中初屢條切政宣宗喜曰牛氏果有子差慰人意出
為金州刺史累遷吏部郎中失權倖意貶國子博士分
司東都復以吏部召兼史館修撰咸通中進至戶部侍
郎襲奇章侯坐累貶未一歲復官久之檢校兵部尚書
山南西道節度使在鎮三年徐州盜起神策兩中尉諷
諸藩悉財助軍蔚索府帛三萬以獻中人嫌其吝用吳
行魯代還及黃巢入京師遁山南故吏民喜蔚至爭迎

候因請老以尚書右僕射致仕卒子循徽

徽舉進士累擢吏部員外郎乾符中選曹猥濫吏多姦
歲調四千員徽治以剛明柅杜干請法度復振蔚避地
于梁道病徽與子扶藍輿歷閣路盜擊其首血流面持
與不息盜迫之徽拜曰人皆有父今親老而疾幸無駭
驚盜感之乃止抵梁徽趨蜀謁行在丐歸侍親疾會拜
諫議大夫固辭見宰相杜讓能曰上遽幸當從親有疾
當侍而徽兄在朝廷身乞還營醫藥時兄循已位給事

中許之父喪客梁漢終喪以中書舍人召辭疾改給事中留陳倉張濬伐太原引為判官敕在所敦遣歲太息曰王室方復廢藏殫耗當協和諸侯以為藩屏而又濟以兵諸侯離心必有後憂不肯起濬果敗復召為給事中楊復恭叛山南李茂貞請假招討節伐之未報而與王行瑜輒出兵昭宗怒持奏不下茂貞亟請帝召羣臣議無敢言徽曰王室多難茂貞誠有功今復恭阻兵而討之罪在不俟命爾臣聞兩鎮兵多殺傷不早有所制

則梁漢之人盡矣請假以節明約束則軍有所畏帝曰
然乃以招討使授茂貞果有功然益偃蹇帝使宰相杜
襲能將兵誅討徹諫曰岐國西門茂貞憑其衆而暴若
令萬分一不利屈威重奈何願徐制之不聽師出帝復
召徹曰今伐茂貞彼衆烏合取必萬全卿計何日有捷
對曰臣職諫爭所言者軍國大體如索賊平之期願陛
下考著龜責將帥非臣職也既而師果敗遂殺大臣王
室益弱俄繇中書舍人為刑部侍郎襲奇章男崔胤忌

徽之正換左散騎常侍從太子賓客以刑部尚書致仕
歸樊川卒贈吏部尚書

叢字表齡第進士繇藩帥幕府任補闕數言事會宰相
請廣諫員宣宗曰諫臣惟能舉職為可奚用衆耶今張
符趙璘牛叢使朕聞所未聞三人足矣以司勳員外郎
為睦州刺史帝勞曰卿非得怨宰相乎對曰陛下此詔
不由刺史縣令不任近臣宰相以是擢臣非嫌也咸通
中拜劍南西川節度使時蠻犯邊抵大渡進略黎雅叩

叩味關謾書求入朝且曰假道叢因其使四十人釋二人還之蠻懼即引去僖宗幸蜀授太常卿以病求為巴州刺史不許還京為吏部尚書嗣襄王亂叢客死太原李宗閔字損之鄭王元懿四世孫擢進士調華州參軍事舉賢良方正與牛僧孺詆切時政觸宰相李吉甫惡之補洛陽尉久流落不偶去從藩府辟署入授監察御史禮部員外郎裴度伐蔡引為彰義觀察判官蔡平還駕部郎中知制誥穆宗即位進中書舍人長慶初錢徽

典貢舉宗閔託所親於徽而李德裕李紳元稹在翰林
有寵於帝共白徽納干丐取士不以實宗閔坐貶劔州
刺史由是嫌忌顯結樹黨相磨軋凡四十年搢紳之禍
不能解俄復為中書舍人典貢舉所取多知名士世謂
之王筍寶厯初累進兵部侍郎父喪解太和二年以吏
部侍郎同中書門下平章事時德裕自浙西召欲以相
而宗閔中助多先得進即引僧孺同秉政相唱和去異
己者德裕所善皆逐之遣中書侍郎久之德裕為相與

宗閔共當國德裕入謝論及朋黨帝曰衆以楊虞卿張
元夫蕭崱為黨魁德裕因請皆出為刺史帝然之宗閔
曰德裕居外久其知黨人不如臣之詳虞卿日見賓客
於第世號行中書故臣未嘗與美官德裕曰給事中非
美官云何宗閔大沮俄以同平章事為山南西道節度
使李訓鄭注始用事疾德裕共訾短之乃罷德裕復召
宗閔知政事進封襄武縣侯恣肆附託會虞卿以京兆
尹得罪極言營解帝怒叱曰爾嘗詆鄭覃為妖氣今自

為妖耶即出為明州刺史貶處州長史訓注復劾宗閔
貶潮州司戶參軍事時訓注欲以權市天下凡不附已
者皆指以二人黨逐去之人人駭栗帝乃詔宗閔德裕
姻家門生故吏自今一切不問嘗歎曰去河北賊易去
此朋黨難開成初幽州史元忠河陽李載義累表論洗
乃徙為衛州司馬楊嗣復輔政與宗閔善欲復用而畏
鄭覃乃託官人諷帝帝因紫宸對果曰朕念宗閔久斥
應授一官覃與陳夷行往復辨論固執不可帝終以嗣

復言擢宗閔杭州刺史遷太子賓客分司東都既而覃
夷行去位嗣復謀引宗閔輔政未及而文宗崩會昌中
劉稹以澤潞叛德裕建言宗閔素厚從諫今上黨近東
都乃拜宗閔湖州刺史稹敗得交通狀貶漳州長史流
封州宣宗即位徙柳州司馬卒子崑瓚皆擢進士令狐
綯作相而瓚以知制誥歷翰林學士綯罷瓚亦出為桂
管觀察使不善御軍為士卒所逐貶死宗閔弟宗冉其
子湯累官京兆尹黃巢陷長安殺之

楊嗣復字繼之僕射於陵子也八歲知屬文後擢進士
博學宏辭與裴度柳公綽皆為武元衡所知表署劔南
幕府進右拾遺直史館尤善禮家學改太常博士再遷
禮部員外郎累遷中書舍人時於陵為戶部侍郎嗣復
與牛僧孺李宗閔雅相善二人輔政引之然不欲越父
當國故權知禮部侍郎文宗嗣位進戶部侍郎於陵老
求侍不許喪除擢尚書左丞太和中宗閔罷嗣復出為
劔南東川節度使宗閔復相徙西川開成初以戶部侍

郎召領諸道監鐵轉運使俄與李珣並拜同中書門下
平章事弘農縣伯仍領監鐵後紫宸奏事嗣復為帝言
陸沔屏居民間而上書論兵可勸以官珣趣和之鄭覃
不平曰陛下當察朋黨嗣復曰覃疑臣黨臣應允即再
拜祈罷帝方委以政故慰安之它日延英訪對史官不
及知嗣復建言請延英對宰相語闕道德刑政者委中
書門下直日紀錄月付史官它宰相議不同止久之帝
又問延英政事孰當記之珣監修國史對曰臣之職也

陳夷行曰宰相所錄恐掩蔽聖德自盜美名覃曰陛下
開成初政甚善三年後日不逮前嗣復曰開成初覃夷
行當國三年後臣與李珣同進臣不能悉心奉職使政
事日不逮前臣之罪也即叩頭請辭趨出帝使使者召
還曰覃言失何及此邪嗣復闔門不肯起帝乃免覃夷
行相而嗣復專天下事進門下侍郎建言使府官屬多
宜省帝曰無反滯才乎對曰才者自異汰去拙滓者菁
華乃出帝曰昔蕭復秉政難言者必言卿其志之未幾

帝崩中尉仇士良廢遺詔立武宗帝之立非宰相意故
內薄執政臣不加禮自用李德裕而罷嗣復為吏部尚
書出為湖南觀察使會誅薛季稜劉弘逸中人多言嘗

附嗣復珏不利於陛下帝剛急即詔中使分道誅嗣復

等德裕與崔鄆崔珪等詣延英論救

案舊書紀時相之
論救嗣復但稱崔

鄆崔珪而不及德裕蓋以嗣復乃宗問黨疑德裕未肯
申救也然致綱目書此事并載杜悰奔馬見德裕語則
論救嗣復實德裕為之倡
舊書反不著其名誤也帝曰朕贊嗣之際珏等各

附會若珏季稜屬陳王猶是先帝意如嗣復弘逸屬安

王乃內為楊妃謀使安王立肯容我耶言畢戚然乃曰
為卿赦之因追使者還貶嗣復潮州刺史宣宗立起為
江州刺史以吏部尚書召道岳州卒年六十六贈尚書

左僕射謚曰孝穆嗣復五子其顯者授損

按舊書嗣復子損授校尉

擢以損次授前與世系表合此云授損似失其次

授字得符於昆弟最賢由進士第累遷戶部侍郎以母
病求為祕書監後以刑部尚書從昭宗幸華從太子少
保卒贈尚書左僕射

子哭

按寧相世家作然
舊書亦作哭表誤

字公隱累擢左拾遺昭宗初

立數遊宴上疏極諫歷戶部員外郎崔胤招朱全忠入

京師哭挈族客湖南終諫議大夫

損字子黯絲蔭補藍田尉至殿中侍御史家新昌里與

路巖第接巖方為相欲易其廐以廣第損族仕者十餘

人議曰家世盛衰繫權者喜怒不可拒損曰今尺寸土

皆先人舊貲非吾等所有安可奉權臣邪窮達命也卒

不與巖不悅使損按獄黔中踰年還三遷絳州刺史巖

罷去召為給事遷京兆尹與宰相盧攜雅不叶復除給事中陝虢軍亂逐觀察使崔莨命損代之至則盡誅有罪者拜平盧節度使徙天平未赴復留卒官下

楊虞卿字師臯虢州弘農人父寧有高操擢明經調臨渙主簿棄官還夏與陽城為莫逆交陝虢觀察使李齊運表置幕府齊運入為京兆尹表奉先主簿拜監察御史坐累免順宗初召為殿中侍御史終國子祭酒虞卿第進士博學宏辭為校書郎累擢監察御史穆宗初立

逸游荒恣虞卿上疏極諫俄詔行勞西北邊還遷侍御
史改禮部員外郎史館修撰進吏部會曹史李寶等鬻
偽告身調官六十五員贓千六百萬以上虞卿發其姦
寶等繫御史府而虞卿親吏嘗受二百萬亡命私奴受
三十萬虞卿縛奴送獄三司嚴休復高鉞韋景休雜推
寶等皆誅死虞卿坐不檢下免官李宗閔牛僧孺輔政
引為右司郎中弘文館學士再遷給事中虞卿佞柔善
諧麗權幸倚為姦利宗閔待之尤厚就黨中為最能唱

和者以口語軒輊事機故時號黨魁德裕之相出為常
州刺史宗閔復入以工部侍郎召遷京兆尹太和九年
京師訛言鄭注為帝治丹剔小兒肝心用之民相驚帝
不悅注亦內不安而雅與虞卿有怨即約李訓奏言語
出虞卿家帝大怒下虞卿詔獄於是諸子弟自囚闕下
稱冤虞卿得釋貶虔州司戶參軍死弟漢公

漢公舊書作虞卿

之弟考字相世系表與舊書同新書誤以漢公為虞卿之子今改正

子知退知權擅堪皆

擢進士第

漢公字用乂始辟興元李絳幕府絳死不與其禍累遷
戶部郎中史館修撰轉司封郎中坐虞卿下除舒州刺
史徙湖毫蘓三州擢桂管浙東觀察使由戶部侍郎拜
荆南節度使召為工部尚書或劾漢公治荆南有禽賊
降祕書監稍遷國子祭酒宣宗擢為同州刺史於是給
事中鄭裔綽鄭公與共奏漢公冑狠無廉槩不可處近
輔三還制書帝不從會寒食宴近臣帝言漢公事裔綽
獨對同州太宗興王地漢公既以墨敗陛下容可舉劾

部私貪人帝恚見顏問翌日斥喬綽為高州刺史漢公
自同州更宣武天平兩節度使卒子籌範仕亦顯

汝士字慕巢中進士第又擢宏辭牛李待之善引為中
書舍人開成初由兵部侍郎為東川節度使時嗣復鎮
西川乃族昆弟對擁旌節世榮其門終刑部尚書子知
溫知至悉以進士第八官知溫終荆南節度使知至為
宰相劉瞻所善以此部郎中知制誥瞻得罪亦貶瓊州
司馬累擢戶部侍郎

張宿者本寒人自名諸生憲宗為廣陵王時因張茂宗薦得出入邸中誕謠敢言及監撫自布衣授左拾遺交通權幸四方賂遺滿門數召對不能慎密坐漏禁中語貶郴丞十餘年累遷比部員外郎宰相李逢吉數言其狡譎不可信白為濠州刺史宿上疏自言留不遣帝欲以為諫議大夫逢吉曰諫議職要重當待賢者宿細人不可使汙是官陛下必用之請先去臣乃可帝不悅後逢吉罷詔權知諫議大夫宿怨執政不與已乃日肆讒

恭與皇甫鎛相附離多中傷正人君子元和未持節至
淄青李師道願割地遣子入侍既而悔復遣宿往暴卒
于道贈祕書監

熊望者字原師擢進士第性險躁以辯說游公卿間劉
栖楚為京兆尹樹權勢望日出入門下為刺取事機陰
佐計畫敬宗喜為歌詩議置東頭學士以備燕狎栖楚
薦望未及用帝崩文宗立韋處厚秉政詔望因緣險薄
營密職圖褻幸謹沸衆議貶漳州司戶參軍

相耆者有緞橫學父良器為時威名將是時王承宗以
常山叛朝廷厭兵耆杖策詣淮西行營謁裴度且言願
得天子一節馳入鎮可掉舌下之度為言乃以左拾遺
往既至以大誼動承宗至泣下乃請獻二州以二子入
質真擢耆左拾遺由是聲震一時遷起居舍人王承元
徙義成軍遣諫議大夫鄭覃往慰成德軍賚緡錢百萬
賚未至舉軍譁議穆宗遣耆諭天子意眾乃信悅轉兵
部郎中諫議大夫太和初李同捷反詔兩河諸鎮出兵

久無功乃授耆德州行營諸軍計會使與判官沈亞之
諭旨會橫海節度使李祐平德州同捷窮請降祐使大
將萬洪代守滄州同捷未出也耆以三百騎馳入滄以
事誅洪與同捷朝京師既行謀言王廷湊欲以奇兵劫
同捷耆遂斬其首以獻諸將嫉耆功比奏攢詆文宗不
獲已貶耆循州司戶參軍亞之南康尉初祐聞耆殺洪
大驚疾遂劇帝曰祐若死是耆殺之至是積前怒詔長

流愛州賜死

謹按通鑑輯覽

御批
錄之
其功
固可
抵過
也乃
以李
祐之
死違
令自
盡何
以厲
士用
命之
哉



欽定續通志卷二百六十六

欽定四庫全書

史部

欽定續通志卷三百

六十七至
七十

中書_臣李采覆勘

總校官原任侍講_臣王燕緒

欽定四庫全書

欽定續通志卷一百六十七

列傳

唐 六十七

韓愈

孟郊 盧仝

張籍 賈島

皇甫湜 劉叉

白居易

行簡 敏中

韓愈字退之鄧州南陽人

按舊書作昌黎人考洪興祖年譜辨證並方崧卿增考年

譜云韓氏世居潁川與昌黎之韓支派各別宋元豐元年封愈為昌黎伯蓋取其郡望而愈每自稱為昌黎人亦本其郡望也是舊書稱其望新書著其地皆不悞又按北魏韓麒麟最著于魏史稱其為昌黎棘城人本望始

此今直隸永平府之昌黎縣乃金世宗大定二十九年始立是在韓愈四百年後矣七世祖茂有功於後魏封安定王父仲卿為武昌令有美政既去縣人刻石頌德終祕書郎愈生三歲而孤隨伯兄會貶官嶺表會卒嫂鄭鞠之愈自知讀書日記數千百言比長盡能通六經百家學擢進士第會董晉為宣武節度使表署觀察推官晉卒愈從喪出不四日汴軍亂乃去依武寧節度使張建封建封辟府推官操行堅正鯁言無所忌調四門博士遷監察御史上疏極論官市德宗

怒貶陽山令有愛在民民生子多以其姓字之改江陵
法曹參軍元和初權知國子博士分司東都三歲為真
改都官員外郎即拜河南令遷職方員外郎華陰令柳
澗有臯前刺史劾奏之未報而刺史罷澗諷百姓遮索
軍頓役直後刺史惡之按其獄貶澗房州司馬愈過華
以為刺史陰相黨上疏治之既御史復問得澗贓再貶
封溪尉愈坐是復為博士既才高數黜官又下遷乃作
進學解以自諭執政覽之竒其才改比部郎中史館修

撰轉考功知制誥進中書舍人初憲宗將平蔡命御史中丞裴度使諸軍按視及還且言賊可滅與宰相議不合愈亦奏言蔡可滅在陛下斷與不斷耳執政不喜會有入詆愈在江陵時為裴均所厚均子鶚素無狀鶚還省父愈為序餞鶚仍呼其字謗語囂暴由是改太子右庶子及度以宰相節度彰義軍宣慰淮西奏愈行軍司馬愈請乘遽先入汴說韓弘使叶力元濟平遷刑部侍郎憲宗遣使者往鳳翔迎佛骨入禁中三日乃送佛祠王

公士人奔走膜頃愈惡之乃上表極論帝大怒持示宰相將抵以死裴度崔羣曰愈言訐悟罪之誠宜然非內懷至忠安能及此願少寬假以來諫諍帝曰愈言我奉佛太過猶可容至謂東漢奉佛以後天子咸天促言何乖刺邪愈人臣狂妄敢爾固不可赦於是中外駭懼雖戚里諸貴亦為愈言乃貶潮州刺史既至潮以表哀謝帝頗感悔欲復用之持示宰相皇甫鎛素忌愈直即奏言愈終狂疏可且內移乃改袁州刺史初愈至潮州問

民疾苦皆曰惡溪有鱷魚食民畜產且盡民以是窮愈自為文祭之一夕徙去自是潮無鱷魚患袁人以男女為隸過期不贖則沒入之愈至悉計庸得贖所沒歸之父母七百餘人因與約禁其為隸召拜國子祭酒轉兵部侍郎鎮州亂殺田弘正而立王廷湊詔愈宣撫既行衆皆危之元稹言韓愈可惜穆宗亦悔詔愈度事從宜無必入愈至廷湊嚴兵迓之甲士陳廷既坐廷湊曰所以紛紛者乃此士卒也愈大聲曰天子以公為有將帥

材故賜以節豈意同賊反邪語未終士前奮曰先太師
為國擊朱滔血衣猶在此軍何負乃以為賊乎愈曰以
為爾不記先太師也若猶記之固善天寶以來安祿山
史思明李希烈等有子若孫在乎亦有居官者乎衆曰
無愈曰田公以魏博六州歸朝廷官中書令父子受旗
節劉悟李祐皆大鎮此爾軍所共聞也衆曰弘正刻故
此軍不安愈曰然爾曹亦害田公又殘其家矣復何道
衆謹曰善廷湊慮衆變疾麾使去因曰今欲廷湊何所

為愈曰神策六軍將如牛元翼者不乏但朝廷顧大體不可棄之公久圍之何也廷湊曰即出之愈曰若爾則無事矣會元翼亦潰圍出廷湊不追愈歸奏其語帝大悅轉吏部侍郎時宰相李逢吉惡李紳欲逐之遂以愈為京兆尹兼御史大夫特詔不臺參而除紳中丞紳果劾奏愈愈以詔自解其後文刺紛然宰相以臺府不協遂罷愈為兵部侍郎而出紳江西觀察使紳見帝得留愈亦復為吏部侍郎長慶四年卒年五十七贈禮部尚

書論曰文愈性明銳不詭隨與人交始終不少變成就
後進士往往知名經愈指授皆稱韓門弟子愈官顯稍
謝遣凡內外親若交友無後者為嫁遣孤女而卹其家
嫂鄭喪為服暮以報每言文章自漢司馬相如太史公
劉向揚雄後作者不世出故愈深探本元卓然樹立成
一家言其原道原性師說等數十篇皆奧衍闡深與孟
軻揚雄相表裏而佐佑六經云從愈游者若孟郊張籍
亦皆自名於時

孟郊者字東野湖州武康人少隱嵩山性介少諧合愈
一見為忘形交年五十得進士第調溧陽尉縣有投金
瀨平陵城林薄蒙翳下有積水郊間往坐水旁裴回賦
詩而曹務多廢令白府以假尉代之分其半奉鄭餘慶
為東都留守署水陸轉運判官餘慶鎮興定奏為參謀
卒年六十四張籍諡曰貞曜先生郊為詩有理致最為
愈所稱

張籍者字文昌和州烏江人第進士為太常寺太祝久

次遷祕書郎愈薦為國子博士歷水部員外郎主客郎中當時有名士皆與遊而愈賢重之籍為詩長於樂府多警句仕終國子司業

皇甫湜字持正睦州新安人擢進士第為陸渾尉仕至工部郎中辨急使酒數忤同省求分司東都留守裴度辟為判官度修福先寺將立碑求文於白居易湜怒曰近捨湜而遠取居易請從此辭度謝之湜即請斗酒飲酣援筆立就度贈以車馬繒綵甚厚湜大怒曰自吾為

顧況集序未嘗許人今碑字三千字三緘何遇我薄耶
度笑曰不羈之才也從而酬之

盧仝居東都愈為河南令愛其詩厚禮之仝自號玉川
子嘗為月蝕詩以譏切元和逆黨愈稱其工時又有賈
島劉叉皆韓門弟子

賈島字浪仙范陽人初為浮屠名无本愈教其為文遂
去浮屠舉進士文宗時坐飛謗貶長江主簿會昌初以
普州司倉參軍遷司戶未受命卒年五十六

劉乂者亦一節士少放肆為使行繼乃折節讀書能為
歌詩聞愈接天下士步歸之後不知所終

白居易字樂天其先蓋太原人北齊五兵尚書建有功
於是賜田韓城子孫家焉又徙下邳父季康為彭城令

李正己之叛說刺史李洧自歸累擢襄州別駕居易敏
悟絕人工文章未冠謁顧況况吳人恃才少所推可見
其文自失曰吾謂斯文遂絕今復得子矣貞元中擢進
士拔萃皆中補校書郎元和元年對制策乙等調監屋

尉明年為集賢校理月中召入翰林為學士遷左拾遺
四年天子以旱甚下詔有所蠲貸振除災沴居易見詔
節未詳即建言乞盡免江淮兩賦以救流瘠且多出宮
人憲宗頗采納李師道上私錢六百萬為魏徵孫贖故
第居易言徵任宰相太宗用殿材成其正寢後嗣不能
守陛下宜以賢者子孫贖而賜之師道人臣不宜掠美
帝從之河東王鐔將加平章事居易以為宰相天下具
瞻非有重望顯功不可任按鐔誅求百計不卹彫瘵所

得財號為羨餘以獻令若假以名器非所以訓四方也
帝乃止是時孫璿以禁衛勞擢鳳翔節度使張奉國定
徐州平李錡有功遷金吾將軍居易為帝言宜罷璿進
奉國以竦天下忠臣心度支有囚繫閹鄉獄更三赦不
得原又奏言父死繫其子夫久繫妻嫁債無償期禁無
休日請一切免之奏凡十餘上益知名會王承宗叛帝
詔吐突承璀率師出討居易諫唐家制度每征伐專委
將帥責成功比年始以中人為都監韓全義討淮西賈

良國監之高崇文討蜀劉貞亮監之且興天下兵未有以中人專統領者神策既不置行營節度即承瓘為制將又克諸軍招討處置便是實都統恐四方聞之必輕朝廷後世且傳中人為制將自陛下始陛下忍受此名哉且劉濟等洎諸將必恥受承瓘節制心有不樂無以立功此乃資承宗之姦挫諸將之銳帝不聽既而兵老不決居易上陳利害請罷承瓘會承宗請罪兵遂罷後對殿中論執彊鯁帝未諭輒進曰陛下誤矣帝變色罷

欲斥之絳曰陛下啟言者路故羣臣敢論得失若黜之是箝其口使自為謀非所以發揚盛德也帝悟待之如初歲滿當遷帝以資淺且家素貧聽自擇官居易請如姜公輔以學士兼京兆戶曹參軍以便養詔可明年以母喪解還拜左贊善大夫是時盜殺武元衡京都震擾居易首上疏請亟捕賊刷朝廷恥以必得為期宰相嫌其出位不悅出為州刺史中書舍人王涯上言不宜治郡追貶江州司馬久之徙忠州刺史入為司門員外郎

以主客郎中知制誥穆宗好畋游獻續虞人箴以諷俄
轉中書舍人田布拜魏博節度使命持節宣諭布遺五
百緡詔使受之辭曰布父讎國恥未雪人當以物助之
乃取其財誼不忍方諭問旁午若悉有所贈則賊未殄
布貨竭矣詔聽辭餉是時河朔復亂合諸道兵出討遷
延無功賊取弓高絕糧道深州圍益急居易上言兵多
則難用將衆則不一宜詔魏博澤潞定滄四節度令各
守境以省度支資餉每道各出銳兵三千使李光顏

將光顏故有鳳翔徐滑河陽陳許軍無慮四萬可徑薄
賊開弓高糧路合下博解深州之圍與牛元冀合還裴度
招討使使悉太原兵西壓境見利乘隙夾攻之間令招
諭以動其心未及誅夷必自生變不聽乃勾外遷為杭
州刺史始築堤捍錢塘湖鍾洩其水溉田千頃復浚李
泌六井民賴以汲久之以太子左庶子分司東都復拜
蘇州刺史病免文宗立以祕書監召遷刑部侍郎封晉
陽縣男太和初二李黨事興楊虞卿與居易姻家而善

李宗閔居易惡緣黨人斥乃移病還東都除太子賓客
分司踰年即拜河南尹復以賓客分司開成初起為同
州刺史不拜以太子少傅進馮翊縣侯會昌初以刑部
尚書致仕六年卒年七十五贈尚書右僕射宣宗以詩
予之遺命薄葬毋請諡居易與弟行簡從祖弟敏中友
愛東都所居履道里疏沼種樹構石樓香山鑿八節灘
自號醉吟先生又稱香山居士嘗與胡杲吉旼鄭據劉
真盧真張渾狄兼謨盧貞燕集人慕之繪為九老圖居

易於文章精切然最工詩初頗以規諷得失及其多更
下偶俗好至數千篇當時士人爭傳鷄林行賈售其國
相率篇易一金初與元稹酬詠故號元白稹卒又與劉
禹錫齊名號劉白始生七月能展書姆指之無兩字雖
試百數不差敏中為相請諡有司曰文東都江州人為
立祠焉

行簡字知退擢進士辟廬坦劍南東川府罷與居易自
忠州入朝授左拾遺累遷主客員外郎代韋詞判度支

按進郎中長慶時振武營田使賀拔志營田數過實詔行簡覆按之發其妄志懼自刺不殊行簡敏而有辭後學所慕尚寶歷二年卒

敏中字用晦少孤承學諸兄長慶初第進士辟義成節度使李聽府聽一見許其遠到遷右拾遺改殿中侍御史為符澈邠寧副使澈卒以能政聞御史中丞高元裕薦為侍御史再轉左司員外郎武宗雅聞居易名欲召用之是時居易足病廢宰相李德裕言其衰恭不任事

即薦敏中文詞類其兄而有器識即日知制誥召入翰林為學士進承旨宣宗立以兵部侍郎同中書門下平章事遷中書侍郎兼刑部尚書德裕貶敏中抵之甚力議者訾惡歷尚書右僕射門下侍郎封太原郡公自員外凡五年十三遷崔鉉輔政欲專任患敏中居右會党項數寇邊鉉言宜得大臣鎮撫敏中以司空平章事兼邠寧節度招撫制置使帝御安福樓以餞頒璽書諭慰賜通天帶衛以神策兵開府辟士禮如裴度討淮西時

次寧州諸將已破羗賊敏中即說諭其衆皆願棄兵為
業乃自南山並河按屯堡回繞千里又規蕭關通靈威
路使為耕戰具踰年檢校司徒徙劍南西川增驛軍完
創闢壁治蜀五年有勞加黃太子太師徙荆南懿宗立
召拜司徒門下侍郎還平章事數月足病不任謁固求
辟位不許中使者勞問俾對別殿母拜右補闕王譜奏
言敏中病四月願聽其請無使有持寵曠貴之譏書聞
帝怒斥譜陽翟令未幾加敏中中書令自裴度以勲德

居而敏中以恩澤進咸通二年南蠻擾邊召敏中入議
許挾扶升殿固求免乃出為鳳翔節度使三奏願歸守
墳墓除東都留守不敢拜許以太傅致仕詔書未至卒
冊贈太尉

欽定續通志卷二百六十七

欽定四庫全書

欽定續通志卷二百六十八

列傳

唐六十八

錢徽

崔咸

韋表微

高鉞

涇錯

銖湘

馮宿

定審

李虞仲

李翱

盧簡辭

簡能簡求

弘止

高元裕

封敖

鄭薰

敬晦

韋博

李景讓

景溫

錢徽字蔚章父起附見盧綸傳徽中進士第居穀城穀城令王郢善接僑士遊客以財貸饋坐是得臯觀察使樊澤視其簿獨徽無有乃表署掌書記又辟宣歙崔衍府王師討李希烈檄遣采石兵會戰戍還頗驕蹇會衍病亟徽請召池州刺史李遜署副使遜至而行死一軍賴以安入拜左補闕以祠部員外郎為翰林學士三遷中書舍人加承旨憲宗嘗獨召徽從容言它學士皆高

選宜預聞機密廣參決帝稱其長者是時內積財圖復
河湟然禁無名貢獻而至者不甚却徽懇諫罷之帝密
戒後有獻毋入右銀臺門以避學士以論淮西事忤旨
罷職徙太子右庶子出虢州刺史入拜禮部侍郎宰相
段文昌學士李紳以所善士諉徽求致第籍徽不能如
二人請因是共擠其非有詔王起白居易覆試而黜者
過半遂貶江州司馬或勸徽出文昌紳私書自直徽曰
苟無愧於心安事辨證邪敕子弟焚書

謹按通鑑輯覽

欽定四庫全書

欽定續通志

卷二百六十八

二

御批黨牛怨李已足紊亂朝常至通關節於貢舉是以先進引後進其為門戶紛爭爪連株蔓猶不可究詰矣若時人稱美錢徽不奉人私書此更贅說既有私書則學舉者已屬納人關節且未必止段李二人而已徽即下愚肯自言耶史書之不
足信如此 初州有盜劫貢船捕吏取濱江惡少年二百

人繫訊徽按其枉悉縱去數日舒州得真盜州有牛田錢百萬刺史以給宴贈餉者徽曰此農耕之備可它用哉命代貧民租入轉湖州時宣歙旱左丞孔戣請徙徽領宣歙宰相以其本文辭進不用戣曰相君宜知天下事徽江號之治不及知况其它邪還遷工部侍郎出為

為華州刺史文宗立召拜尚書左丞會宣墨麻羣臣在
廷方大寒稍稍引避徽素恭謹不去位久而仆因上疏
告老不許太和初復為華州俄以吏部尚書致仕卒年
七十五贈尚書右僕射徽任庶子時韓公武以賂結公
御遺徽錢二十萬不納或言非當路可無讓徽曰取之
在義不在官時稱有公望子可復方義可復副鄭注出
鎮鳳翔注敗及禍方義終太子賓客子珣字瑞文善文
辭宰相王搏薦知制誥進中書舍人搏得罪珣貶撫州

司馬

崔咸字重易博州博平人元和初擢進士第又中宏辭
鄭餘慶李夷簡皆表在幕府與均禮入朝為侍御史處
正特立風采動一時累遷陝虢觀察使日與賓客僚屬
痛飲未嘗醒夜分輒決事裁剖精明無一毫差吏稱為
神入拜右散騎常侍祕書監太和八年卒諸文中歌詩

最善

韋表微字子明隋鄆城公元禮七世孫擢進士第數辟

諸使府久之入授監察御史裏行俄為翰林學士是時
李紳忤宰相貶端州龐嚴蔣防皆謫去學士缺人人爭
薦丞相所善者表微獨薦韋處厚人服其公進知制誥
後與處厚議增選學士復薦路隋處厚以諸父事表微
因曰隋位崇入且翁右奈何答曰選德進賢初不計私
也久之遷中書舍人敬宗嘗語左右欲相二韋會崩文
宗立獨相處厚進表微戶部侍郎丌志紹叛詔李聽率
師討之次河上天子憂無成功表微曰以聽軍勢不十

五日必破賊及捷書上止決日志紹殘兵六千奔昭義
宰相請推處首惡者誅之歸脅從者于魏表微上言逆
子降又殺之非好生也請以聽代史憲誠于魏志紹之
徒可使招納不聽以病痼罷學士卒年六十贈禮部尚
書著有春秋三傳總例九經師授譜

高鈇字翹之史失其所人與弟銖錯俱擢進士第累
遷右補闕史館修撰元和末以中人為和糴使鈇繼疏
論執轉起居郎數陳政得失穆宗嘉之面賜緋魚召入

翰林為學士張韶變興倉卒從敬宗夜駐左軍翌日進知制誥拜中書舍人入見帝因勸躬聽擘以示憂勤帝納其言賜錦綵俄罷學士累進吏部侍郎人善其振職出為同州刺史卒贈兵部尚書

子湜字澄之第進士累官右諫議大夫咸通末為禮部侍郎時士多繇權要干請湜不能裁既而抵帽於地曰吾決以至公取之得譴固吾分乃取公乘億許棠聶夷中等皆有名當時以兵部侍郎判度支出為昭義節度

使為下所逐貶連州司馬

按舊傳祇載湜為禮部侍郎餘俱不載考本紀及他傳湜

為兵部郎中中書舍人權知禮部貢舉及為荆南節度判官並無為昭義節度語至咸通以後昭義軍之亂一於乾符五年時為節度者李鈞也一於中和元年高潯牙將劉廣據潞州潯天井關戍將孟方立攻殺廣自稱留後則為昭義節度為下所逐者高潯非高湜也新書蓋移潯事為湜事然潯貶端州刺史非連州司馬卒無定據謹附

注于此

以太子賓客分司東都卒

銖字權仲既擢第署太原張弘靖幕府入遷監察御史

太和時累擢給事中文宗得李訓驟拜侍講學士銖率

諫官伏閣言訓素行儉邪不可任必亂天下明年訓當

國出銖為浙東觀察使歷義成節度使大初中遷禮部

尚書判戶部徙太常卿

按舊書銖於開成三年就知檢校左散騎常侍尋入為刑部侍

郎四年七月出為河南尹會昌末為吏部侍郎與此互異卒

錯字弱金連中進士宏辭科辟河東府參謀歷吏部員

外郎遷中書舍人開成元年權知貢舉

按舊書錯權知貢舉在太和九

年十月次年為開成元年乃以錯為禮部侍郎新書俱屬之開成元年誤錯以籍上帝語侍

臣曰比年文章卑弱今所上差勝於前即以錯為禮部

侍郎閱三歲頗得才實始歲取四十人才益少詔減十

人猶不能滿遷吏部侍郎出為鄂岳觀察使卒贈禮部尚書

子湘字濬之擢進士第歷長安令右諫議大夫從兄湜與路巖親善而湘厚劉瞻巖既逐瞻貶湘高州司馬僖

宗初召為太子右庶子

按僖傳肅宗紀以為韋保衡所逐考僖宗紀即位之九月保衡

貶賀州而湘即於是月召為諫議大夫其為保衡所逐而非路巖明矣又按僖傳湘乾符三年九月以中書舍人權知禮部侍郎蓋初以諫議召而旋為中書舍人此謂召為右庶子未知何據終江南觀察

使

馮宿字拱之發州東陽人父子華廬親墓有靈芝白兔
號孝馮家宿貞元中與弟定從弟審寬並擢進士第徐
州張建封表掌書記建封卒子愔為軍中脅主留事李
師古將乘喪復故地愔大懼於是王武俊擁兵觀釁宿
以書說之武俊悅即以表聞遂授愔留後宿不樂佐愔
更從浙東賈全觀察府愔憾其去奏貶泉州司戶參軍
召為太常博士再遷都官員外郎裴度節度彰義軍表
為判官淮西平除比部郎中長慶時進知制誥牛元翼

徙節山南東道為王廷湊所圍以宿總留事還進中書
舍人出華州刺史避諱不拜徙左散騎常侍兼集賢殿
學士拜河南尹歷工部刑部二侍郎修格後敕三十篇
行於時累封長樂縣公擢東川節度使完城郭增兵械
十餘萬詔分餘甲賜黔巫道涪水數壞民廬舍宿修利
防庸一方便賴疾革將斷重刑家人請宥之宿曰命修
短天也撓法以求祐吾不敢卒年七十贈吏部尚書諡
曰懿子圖字昌之連中進士宏辭科大中時終戶部侍郎

判度支寬為起居郎

定字介夫偉儀觀與宿齊名人方漢二馮于頔素善之
頔在襄陽定徒步上謁吏不肯白乃亟去頔聞斥吏歸
錢五十萬及諸境定返其遺以書讓頔不下士頔大慙
第進士異等辟浙西薛平府以鄆尉為集賢校理始定
居喪號毀甚故數移疾大學士疑其簡怠奪職三遷祠
部員外郎出為郢州刺史坐游宴不節免官起為國子
司業再遷太常少卿文宗嘗詔開元霓裳羽衣舞參以

雲韶肄於廷定部諸公立縣間端凝若植帝異之問學
士李珣珣以定對帝喜曰豈非能古章句者耶親誦定
送客西江詩召升殿賜禁中瑞錦詔悉所著以上遷諫
議大夫請左右史從宰相至延英記所言執政不悅改
太子詹事鄭覃兼太子太師上日欲會尚書省定據禮
當集詹事府詔可論者多其正換衛尉卿以散騎常侍
致仕卒贈工部尚書諡曰節

審字退思開成中為諫議大夫拜桂管觀察使歷國子

祭酒監有孔子碑武后所立睿宗署額審請琢周著唐終祕書監子緘字宗之乾符初歷京兆河南尹

李虞仲字見之父端見文苑傳虞仲第進士宏辭累遷太常博士建言諡者所以表德懲惡春秋褒貶法也古者將葬請諡今近或二三年遠乃數十年然後請諡人歿已久風績湮歇採諸傳聞不可考信臣請凡得諡者前葬一月請考功敕太常定議其不請與請而過時者聽御史劾舉居京師不得過半期居外一期若善惡著

而不請許考功察行謚之節行卓異雖無官及官卑者在所以聞詔可寶歷初以兵部郎中知制誥進中書舍人出為華州刺史歷吏部侍郎簡儉寡欲時望歸重卒年六十五贈吏部尚書

李翱字習之後魏尚書左僕射沖十世孫中進士第始調校書郎元和初為國子博士史館修撰常謂史官紀事不得實乃建言大氏人之行非大善大惡暴於世者皆訪於人人不周知故取行狀諡牒然其為狀者皆故

吏門生苟言虛美溺於文而忘其理臣請指事載功則
賢不肖易見如言魏徵但記其諫爭語足以為直言段
秀實但記倒用司農印追逆兵笏擊朱泚足以為忠烈
不者願敕考功太常史館勿受如此可以傳信後世矣
詔可又條興復太平大畧曰陛下既以武功定海內若
遂革弊事復高祖太宗舊制用中正而不疑屏邪佞而
不邇改税法不督錢而納布帛絕進獻寬百姓租賦厚
邊兵以制蕃戎侵盜數引見待制官問以時事通壅蔽

之路此六者政之根本太平所以興陛下既已能行其難若何而不為其易者乎臣竊惜陛下當可興之時而謙讓未為也再遷考功員外郎初諫議大夫李景儉表

翱自代景儉斥翱下除朗州刺史俄召為禮部郎中

按舊

書穆宗紀翱於穆宗即位之六月貶朗州十一月復書曰以宗正卿李翱為華州刺史翱未嘗為宗正卿由宗正出刺華州者翱也見李翱傳翱與翱文近致訛翱性峭鯁論議無所屈任不

得顯官怫鬱無所發見宰相李逢吉面斥其過失逢吉詭不校翱恚懼即移病滿百日有司白免官逢吉更表

為廬州刺史時州旱遂疫逋捐係路亡籍口四萬權豪
賤市田屋牟厚利而窶戶仍輸賦黜下教使以田占租
無得隱收豪室稅萬二千緡貧弱以安入為諫議大夫
知制誥改中書舍人栢耆使滄州黜盛言其才耆得罪
由是左遷少府少監後歷遷桂管湖南觀察使山南東

道節度使卒

按李翱之為刑部戶部侍郎在為湖南觀察之後山南東節度之前新書不載蓋畧

之也而舊書敬宗紀寶曆二年書曰右散騎常侍李翱卒猶屬謬誤翱未官散騎且歷太和開成至會昌中始卒安得書卒於十餘年前乎蓋亦李翱之誤
翱始從昌黎韓愈為文章辭致

渾厚見推當時故有司亦謚曰文

盧簡辭字子策父綸別傳與兄簡能弟弘止簡求皆有
大並第進士歷佐帥府入遷侍御史習知法令及臺閣
舊事實歷中黎幹子燭詣臺請復葉縣故田有司莫能
知簡辭獨詰曰按幹坐黨魚朝恩誅貲田皆沒大歷後
數十年比有赦令無原洗之言燭安得冒論不為治福
建鹽鐵院官盧昂坐賊簡辭窮按乃得金牀瑟瑟枕大
如斗敬宗曰禁中無此昂為吏可知矣李程鎮太原表

為節度判官入授考功員外郎累擢湖南浙西觀察使
以檢校工部尚書為忠武節度使徙山南東道坐事貶
衢州刺史卒

簡能字子拙太和時累官駕部員外郎鄭注表為鳳翔
判官注為張仲清所殺簡能亦被害子知猷字子譽中
進士第登宏辭補祕書省正字蕭鄴鎮荆南劍南再辟
掌書記入遷右補闕出為饒州刺史以政最聞累進中
書舍人朱玫亂避難不出僖宗還京召拜工部侍郎史

館修撰歷太常卿戶部尚書至太子太師昭宗為劉季述所幽感憤卒贈太尉子文度亦貴顯

弘止

按宰相世系表止作正舊書同今仍新書原文

字子彊佐劉悟府累擢監

察御史沈傳師表為江西團練副使入拜侍御史華州

刺史宇文鼎戶部員外郎盧允中坐贓詔弘止按訊文宗

將殺鼎弘止執據臯由允中鼎乃連坐不應死帝釋之

累遷給事中會昌中出為邢洺磁三州及河北兩鎮宣

慰使還拜工部侍郎以戶部領度支初兩池鹽法弊得

費不相償弘止使判官司空與檢鈎釐正條上新法即
表與兩池使自是課入歲倍用度賴之踰年出為武寧
節度使徐自王智興後吏卒驕奢銀刀軍猶不法弘止
戮其尤無狀者終弘止治不敢譁優詔褒勞弘止羸病
丐身還東都不許徙宣武卒於鎮贈尚書右僕射子虔
灌有美才終祕書監

簡求字子臧始從江西王仲舒幕府兩為裴度元稹所
辟又佐牛僧孺鎮襄陽入邊戶部員外郎會昌中討劉

積以忠武節度使李彥佐為招討使咨選簡求副之俾
知後務歷蘇壽二州刺史大中九年党項擾邊拜涇原
渭武節度使徙義武鳳翔河東三鎮簡求為政長權變
居邊善綏御人皆安之太原統退渾契苾沙陀三部難
馴制它帥或與詛盟質子弟然寇掠不為止簡求歸所
質開示至誠虜憚其恩信不敢亂久之辭疾以太子少
師致仕還東都卒年七十六贈尚書左僕射子嗣業汝
弼皆中進士第汝弼以祠部員外郎知制誥從昭宗遷

洛後依李克用克用表為節度副使

高元裕字景圭其先渤海人第進士累辟節度府以右補闕召道商州會方士趙歸真擅乘驛馬元裕詆曰天子置驛爾敢疾驅耶命左右奪之還具以聞敬宗視朝不時稍稍決事禁中宦豎恣放大臣不得進見元裕諫曰今西頭勢乃重南衙樞密之權過宰相帝頗悟而不能有所檢制人皆危之俄換侍御史內供奉士始相賀李宗閔高其節擢諫議大夫進中書舍人鄭注入翰林

元裕當書命乃言以醫術侍注愧憾及宗閔得臯元裕
坐出錢貶閬州刺史注死復授諫議大夫翰林侍講學
士莊恪太子立擇可輔導者乃蕪賓客進御史中丞累
擢尚書左丞領吏部選出為宣歙觀察使入授吏部尚
書拜山南東道節度使封渤海郡公奏蠲逋賦甚衆在
鎮五年復以吏部尚書召卒於道年七十六贈尚書右
僕射兄少逸長慶末為侍御史坐失舉劾貶贊善大夫
累遷諫議大夫稍進給事中出為陝虢觀察使中人責

峽石驛吏供餅惡鞭之少逸封餅以聞宣宗怒召使者
責曰山谷間是餅豈易具邪謫隸恭陵中人皆斂手以
兵部尚書致仕卒元裕始名允中太和中改今名子璩
字瑩之第進士累官至諫議大夫懿宗時拜劍南東川
節度使召拜中書侍郎同中書門下平章事卒贈司空
太常博士曹鄴建言璩交游醜雜進取多蹊徑請諡為
刺從之

封敎字碩夫其先冀州蓆人元和中署進士第江西裴

堪辟置其府轉右拾遺為宰相李德裕所器會昌初以
左司員外郎召為翰林學士三遷工部侍郎教屬辭贍
敏不為奇澀語切而理勝未幾拜御史中丞與宰相盧
商慮因誤縱死辜復為工部侍郎大中中歷平盧興元
節度使初鄭涯開新路水壞其棧教更治斜谷道行者
告便蓬果賊依雞山寇三川教遣副使王贄捕平之加

檢校吏部尚書還太常卿徙國子祭酒復拜太常進尚

書右僕射

按舊書教入為戶部尚書卒無進尚書右僕射之文其封渤海男則大中初為吏部侍郎

時與表志合
與此互異

然少行檢士但高其才故不至宰相卒子

彥卿望卿從子特卿皆第進士

鄭薰字子溥亡鄉里世系擢進士第歷考功郎中翰林
學士出為宣歙觀察使頗以清力自將牙將素驕共謀
逐出之薰奔揚州貶棣王府長史分司東都懿宗立召
為太常少卿累擢吏部侍郎時數大赦階正議光祿大
夫者得蔭一子門施戟於是宦人用階請蔭子薰却之
不肯叙宰相杜棕才其人擬判度支辭又擬刑部兼御

史中丞固辭乃免久之進左丞性友愛糾劾百口稟不
克求外遷擬華州刺史輒留中為悻侍酬沮後以太子
少師致仕蔣松於廷號七松處士云

敬晦字日彰河中河東人進士及第辟山南東道節度
府與馬曙聯舍於是帥不政法制陵顏曙引大吏廷責
之吏負兼軍職不引咎走訴諸府牙將且十輩方雜語
以申吏枉晦讓諸將曰吏冒軍名公等不能詰反引與
為伍奈何衆愧謝累擢諫議大夫武宗時趙歸真以詐

營罔天子御史平吳湘獄得臯宰相晦上疏極道非是
不少回縱大中中歷御史中丞刑部侍郎諸道鹽鐵轉
運使浙西觀察使徙充海節度使以太子賓客分司卒
贈兵部尚書諡曰肅

韋博字大業京兆萬年人取進士第寢遷殿中侍御史
開成中回鶻入寇以符澈為河東節度使拜博為判官
久之進主客郎中時詔毀佛祠悉浮屠隸主客博言令
太暴宜近中宰相李德裕惡之會羌渾叛以何清朝為

靈武節度使詔博副之擢右諫議大夫召對賜金紫因
行西北邊商虜彊弱還奏有旨進左大夫為京兆尹與
御史中丞竄競不平皆得臯下除博衛尉卿出為平盧
節度使檢校禮部尚書徙昭義卒年六十二贈兵部尚
書

李景讓字後已贈太尉愷孫也

按舊書愷贈司徒非太尉又考吳縝糾繆以李

彭傳言之景讓乃彭之孫愷之曾孫舊書李愷傳愷子彭彭子宏宏子景讓則景讓實愷曾孫此云愷孫未知何性方毅有守寶厯初遷右拾遺淮南節度使王播以據

錢十萬市朝廷懽求領鹽鐵景讓詣延英亟論不可遂知名沈傳師觀察江西表以自副歷中書舍人禮部侍郎商華號三州刺史母鄭治家嚴景讓自右散騎常侍出為浙西觀察使母問行日景讓率然對有日鄭曰如是吾方有事未及行益怒其不嘗告也且曰已貴何庸母行景讓重請輦乃赦故雖老猶加輦救已起欣欣如初嘗怒牙將杖殺之軍且謀變母欲息衆謹召景讓廷責曰爾鎮撫方面而輕用刑一夫不寧豈特上負天子

亦使百歲毋銜羞泉下何面目見先大夫乎將鞭其背
吏大將再拜請不許皆泣謝廼罷一軍遂定入為尚書
左丞拜天平節度使徙山南東道封酒泉郡男大中
進御史大夫尋拜西川節度使以病丐致仕或諫公廉
潔亡素儲不為諸子謀邪景讓笑曰兒曹詎餓死乎輒
還東都以太子太保分司卒年七十二贈太子太保諡
曰孝元和後大臣有德望者以居里顯景讓宅東都樂
和里世稱清德者號樂和李公云

弟景溫歷華州刺史以美政聞累遷尚書右丞盧攜當
國弟隱繇博士遷水部員外郎材下資淺人疾其冒無
敢繩景溫不許赴省時故事久廢景溫既舉職時論
韙之

欽定續通志卷二百六十八

欽定四庫全書

欽定續通志卷二百六十九

列傳

唐 六十九

李渤

裴濟

李中敏

李甘

劉黃

李渤字濬之魏橫野將軍中國公發之裔父鈞殿中侍御史以不能養母廢于世渤恥之不肯仕刻志於學與

仲兄涉侍隱廬山久之更徙少室元和初戶部侍郎李
巽諫議大夫韋況交章薦之詔以右拾遺召渤上書謝
昔屠羊說有位三旌祿萬鍾知貴於屠羊然不可使吾
君妄施彼賤賈也猶能忘已愛君臣雖欲盜榮以濟所
欲得無愧屠羊乎不拜洛陽令韓愈遺書招之渤心善
其言始出家東都朝廷有闕政輒附章列上元和九年
討淮西上平賊三術一曰感二曰守三曰戰感不成不
失為守守不成不失為戰又上禦戎新錄乃以著作郎

召渤遂起歲餘遷右補闕以直忤旨下遷丹王府諮議
參軍分司東都十三年上書言五事一禮樂二食貨三
刑政四議都五辨讎渤雖處外然志存朝廷表疏凡四
十五獻擢為庫部員外郎會皇甫鏐輔政務剝下佐用
度而渤奉詔弔郗士美喪在道上言渭南長源鄉戶四
百今纔四十闔鄉戶三千而今千它州縣大抵類此推
其敝始於均攤逃戶十室五逃則未逃者五家攤稅若
抵石于井非極泉不止此聚斂之臣割下媚上願下詔

一賜禁止計不三年人必歸于農夫農國之本本立而
太平可議矣又言道路第不治驛馬多死憲宗得奏咨
駭即詔出飛龍馬數百給畿驛渤既以峭直觸要臣意
乃謝病歸穆宗立召拜考功員外郎歲終當校考渤自
宰相而下升黜之上奏曰宰相俛文昌值陛下即位用
為輔弼安危治亂一以付之俛等不陳先王道德以沃
君心又不舉舊典以立教化且政之興廢在賞罰俛等
未聞獎一人使在官有所勸黜一人使尸祿有所懼邪

正莫辨賞罰無章陛下比幸驪山宰相學士皆股肱心
腹宜皆知之不先事以諫陷君於過俛與學士杜元穎
等請考中下御史大夫李絳左散騎常侍張惟素右散
騎常侍李益諫幸驪山鄭覃等諫畋游得事君之禮請
考上下崔元略當考上下前考于翬上下而翬以賊敗
請降中中大理卿許季同任翬者應考中中下然頃陷劉
闢棄家以歸忠節明著考中中少府監裴通職修舉考
應中上以封母捨嫡而追所生請考中下奏入不報會

勅請急馮宿領考功以考課止校歲中善惡而勅舉舊
事為褒貶且郎中校京官四品以下黜陟之由三品上
為清望官歲進名聽內考非有司所得專請如故事勅
議遂廢會魏博節度使田弘正表勸為副元穎劾奏勸
狂躁賣直售名外交方鎮不宜在朝出為虔州刺史勸
奏還信州移稅錢二百萬免賦米二萬石廢冗役千六
百人觀察使上狀不閱歲遷江州刺史度支使張平叔
飲天下逋租勸上言度支所收貞元二年流戶賦錢四

百四十萬臣州治田二千頃今旱死者千九百頃若徇
度支所斂臣懼天下謂陛下當大旱責民三十年逋賦
臣刺史上不能奉詔下不忍民窮無所逃死請放歸田
里有詔蠲責渤又治湖水築隄七百步使人不病涉入
為職方郎中進諫議大夫時敬宗晏朝一日羣臣立紫
宸門外老病者幾頓仆渤見宰相曰昨論晏朝事今益
晚是諫官不能移人主意渤請出閣待罪會喚仗乃止
退上疏言今日入閣陛下不時見羣臣羣臣皆布路跛

倚夫跛倚形諸外則憂思結諸內憂倦既積災釁必生
又言左右常侍職規諷循然不事若設官不責實不如
罷之俄充理匭使建言事大者以聞次白宰相下以移
有司有司不當許再納匭妄訴者加所坐一等以絕冒
越詔可時政移近倖紀律蕩然勦勦正不顧惠通章封
無闕日天子雖幼昏亦感寤擢給事中賜金紫服五坊
卒夜鬪傷縣人郭令崔發怒敕吏捕拏其一中人也釋
之帝大怒收發送御史獄會大赦改元發以囚坐鷄竿

下俄中人數十持挺亂擊發敗面折齒幾死既而囚皆
釋而發不得原渤上疏曰縣令曳辱中人中人毆御囚
其罪一也然令罪在赦前而中人在赦後不寘于法臣
恐四夷聞之慢倍之心生矣渤又誦言前神策軍在慢
城募京兆進食牙盤不時治致宦人益橫帝以問左右
皆曰無之帝謂渤有黨出為桂管觀察使它日宰相李
逢吉等見帝言發母故宰相韋貫之姊年八十憂發成
疾帝始免發猶奪其官至文宗乃用發為懷州長史桂

有灘水世言秦命史祿伐粵鑿為漕馬援討徵側復治以通餽後為江水潰毀渠遂廢淺每轉餉役數十戶濟一艘渤醜浚舊道舟楫利焉踰年以病歸洛太和中召拜太子賓客卒年五十九贈禮部尚書渤孤操自將不苟合於世人咸謂之沽激屢以言斥而悻直不少衰守節者尚之

裴濟本河東聞喜人篤學善隸書以蔭仕元和初累遷左補闕於是兩河用兵憲宗任宦人為館驛使檢稽出

納有曹進玉者尤恃恩倨甚使者過至加粹辱宰相李
吉甫奏罷之會伐蔡復以中人領使潏諫曰館驛之務
每驛皆有專知若復以宮闈臣領之則內人而及外事
職分亂矣太平至理澄本正名宜塞侵官之原出位之
漸帝雖不用而嘉其忠擢起居舍人帝喜方士而柳泌
為帝治丹劑求長年帝御劑中躁病渴潏諫曰陛下以
孝安宗廟以仁牧黎庶攘剋妖凶賓禮賢俊神功聖德
前古所不及陛下躬行之天地宗廟必相陛下以億萬

之永今乃方士韋山甫柳泌等以丹術自神更相稱引
詭為陛下延年臣謂有道之士匿名滅景無求於世必
不肯干謁貴近自鬻其伎今之至者自言飛鍊為神以
詆權賄大言怪論取驚流俗偽窮情得不恥遁逃如此
情狀豈可保信夫三牲五穀稟自五行發為五味天地
生之所以奉人聖人節調以致康彊若乃藥劑所以禦
疾豈常進之餌哉況又金石酷烈而燒治積年包灸產
毒未易可制禮君之藥臣先嘗之父之藥子先嘗之臣

願以所治劑俾其人服之竟一歲以考真偽則自然明
驗矣帝怒貶江陵令穆宗立泌等誅召潯再遷刑部郎
中前率府倉曹參軍曲元衡杖民柏公成母死有司以
死在辜外推元衡父蔭贖金公成受賕不訴以赦免潯
議曰杖捶者官得施所部非所部雖有罪必請有司明
不可擅也元衡非在官公成母非所部不可以蔭免公
成取賄仇家利母之死逆天性當伏誅有詔元衡流公
成論死久之繇給事中為汝州刺史越法杖人輒死以太

子左庶子分司東都遷左散騎常侍集賢殿學士改刑部侍郎為華州刺史召拜兵部侍郎出為河南尹復還舊官卒贈戶部尚書諡曰敬濟以道自任悉心事上疾黨附不為權近所持嘗哀古今辭章續梁昭明太子文選自號太和通選上之當時文士非與遊者皆不取世恨其隘憲宗竟以藥棄天下世益謂濟知言穆宗雖誅泌而後稍稍復惑方士有布衣張臯者上疏曰神慮澹則血氣和嗜欲勝則疾疹作古之聖賢務自顧養不以

外物撓耳目聲色敗情性則和平自臻非藥物效也高
宗時處士孫思邈達於養生其言曰人無故不用餌藥
藥有偏助令人藏氣不平夫寒暑為賊節宣乖度有資
於醫尚當重慎故禮稱醫不三世不服其藥庶士猶爾
況天子乎先帝晚節喜方士累致危疾陛下素所詳知
不可更踵前車自貽後悔帝善其言詔訪臯不獲

李中敏字藏之系出隴西元和中擢進士第性剛峭與
杜牧李甘善其文辭氣節大抵相上下沈傳師觀察江

西辟為判官入拜侍御史鄭注誣構宰相宋中錫天下以目太和六年大旱詔詢所以致雨者中敏時以司門員外郎上言昔東海誤殺一孝婦大旱三年宋中錫位宰相為姦人所忌陷不測之辜獄不參驗銜恨而沒天下士皆指目鄭注天之降災殆有由然桑弘羊興冤權之利卜式請烹以致雨况申錫之枉天下知之何惜斬一注以快忠臣之冤帝不省中敏以病告滿歸潁陽

舊書作洛陽

注誅以司勳員外郎召累遷諫議大夫為理匭

使建言上書者將納於匭有司先審其副有不可輒卻之臣謂匭朝出禁中日暮將入為下開必達之路廣聰明直枉結也若有司先裁可否恐事不重密非窮塞得自申意請今後但為引進可否斷自中旨以明置匭之本詔可遷結事中仇士良以開府階蔭其子中敏判曰開府階誠宜蔭子謁者監何由有兒士良慙恚繇是復棄官去開成未為婺杭二州刺史

按通鑑李德裕亦以中敏為楊嗣復之黨

惡之出為婺州刺史是由給事中出為刺史中間未嘗有棄官之事又通鑑紀此在武宗即位之後則中敏之

歷婺杭二州亦不盡在開成末也

卒于官中敏所善李欵字言源長慶

初第進士為侍御史注自邠寧入朝欵伏閣劾秦注內通敕使外結朝臣往來兩地卜射賕謝帝不省後寢用事欵被斥去注死絲倉部員外郎累遷江西觀察使終

澶王傳

謹案通鑑輯覽

批中官蔭子至明季而弊極其實已滋觴於此中敏一判不煩言而切中竅要瑞璽銜恨有志者方當力為主持德裕徒以門戶之見輒加駁謫不顧是非不循法度惟報復私嫌是務可鄙甚矣

李甘字和鼎長慶末第進士舉賢良方正異等累擢侍

御史鄭注侍講禁中求宰相朝廷譁言將用之甘顯倡
曰宰相代天治物者當先德望後文藝注何人欲得宰
相白麻出我必壞之既而麻出乃以趙儼為鄜坊節度
使甘坐輕肆貶封州司馬而李訓內亦惡注繇是注卒
不相甘終于貶始河南人楊牢有至行甘方未顯以書
薦於尹曰執事之部孝童楊牢父茂卿從田氏府趙軍
反殺田氏茂卿死牢自洛陽走常山二千里號伏叛壘
委髮羸骸有可憐狀儼意感解以尸還之單纁冬月往

來太行間凍膚歎瘡銜哀雨血行路稠入為牢泣牢為
兒踐操如此未聞執事門唁而書顯之豈樹風扶教意
耶甘為人遇事慷慨皆此類牢後亦擢進士第

劉黃字去華幽州昌平人客梁汴間明春秋能言古興
亡事沈健於謀浩然有球世意擢進士第自元和之末
宦官益橫建置天子在其掌握威權出人主之右黃常
痛疾太和二年舉賢良方正能直言極諫帝引諸儒百
餘人于廷親策之黃對曰臣誠不佞有正國致君之術

無位而不得行有犯顏敢諫之心無路而不得達常欲
與庶人議于道商賈謗于市得通上聽一悟主心雖被
袂言之罪無所悔况逢陛下詢求過闕咨訪嘉謀制詔
中外舉直言極諫臣辱斯舉專承大問敢不悉意以言
至于上所忌時所禁權幸所諱惡有司所與奪臣愚不
識伏惟陛下少加優容不使聖時有讜言受戮者天下
之幸也臣聞不宜憂而憂者國必衰宜憂而不憂者國
必危臣以為陛下宜先憂者宮闈將變社稷將危天下

將傾四海將亂此四者國家已然之兆故臣謂聖慮宜先及之夫帝業艱難而成之固不可容易而守之太祖肇其基高祖勤其績太宗定其業玄宗繼其明至于陛下二百餘載其間聖明相因擾亂繼作未有不用賢士近正人而能紹興徽烈者也或一日不念則顛覆大器宗廟之恥萬古為恨臣謹按春秋繼故不書即位所以正其始也終必書所終之地所以正其終也故為君者所發必正言所履必正道所居必正位所近必正人春

秋閹弑吳子餘祭書其名譏疏遠賢士昵近刑人有不君之道伏惟陛下思祖宗開國之勤念春秋繼故之誠明法度之端杜篡弑之漸遠刀鋸之賤親骨鯁之直輔相得以顯其任庶寮得以守其官奈何以褻近五六人總天下大政外專陛下之命內竊陛下之權威懾朝廷勢傾海內羣臣莫敢指其狀天子不得制其心禍稔蕭牆姦生帷幄臣恐曹節侯覽復生于今日此宮闈將變也臣謹按春秋定公元年春王不言正月者春秋以為先君

不得正其終則後君不得正其始故曰定無正也今忠
賢無腹心之寄閹寺專廢立之權陷先帝不得正其終
致陛下不得正其始況太子未立郊祀未修將相之職
不歸名器之宜不定此社稷將危也臣謹案春秋王札子
殺召伯毛伯春秋之義兩下相殺不書此書者重其顛
王命也夫天之所授者在命君之所存者在令操其命
而失之者是不君也侵其命而專之者是不臣也君不
君臣不臣此天下所以將傾也臣謹按春秋晉趙鞅以

晉陽之兵叛入于晉書其歸者能遂君側之惡以安其
君故春秋善之今威柄陵夷藩臣跋扈或有不達人臣
之節苟亂者以安君為名不究春秋之微稱兵者以逐
惡為義則典刑不繇天子征伐必自諸侯此海內之將
亂也故樊噲排闥而雪涕袁盎當車而抗辭京房發憤
以殞身竇武不顧而畢命此皆陛下明知之矣臣謹案
春秋晉狐射姑殺陽處父書襄公殺之者以其君漏言
也夫上漏其情則下不敢盡意上泄其事則下不敢盡

言故傳有造膝詭辭之文易有失身害成之戒今公卿大臣非不欲為陛下言之慮陛下不能用也忽而不用必泄其言臣下既言而不行必嬰其禍適足鉗直臣之口而重姦臣之威是以欲盡其言則有失身之懼欲盡其意則有害成之憂裴回鬱塞以須陛下感悟然後盡其啓沃陛下何不以聽朝之餘時御便殿召當世賢相老臣訪持變扶危之謀求定傾搖亂之術塞陰邪之路屏褻狎之臣制侵陵迫脅之心復門戶掃除之役戒其所宜

戒憂其所宜憂既不得治其前當治于後既不得正其始當正其終昔秦之亡也失于彊暴漢之亡也失于微弱彊暴則姦臣畏死而害上微弱則彊臣竊權而震主伏見敬宗不虞亡秦之禍不翦其萌伏惟陛下深軫亡漢之憂以杜其漸則祖宗之洪業可紹三五之遐軌可追矣臣謹案春秋書梁亡不書取者梁自亡也以其思慮昏而耳目塞上出惡政人為寇盜皆不知其所以然以自取其滅亡也臣聞國君之所以尊者重其社稷也

社稷之所以重者存其百姓也苟百姓不存則雖社稷
不得固其重社稷不重則人君不得保其尊故治天下
者不可不知百姓之情夫百姓者陛下之赤子陛下宜
令慈仁者視育之如保傅焉如乳哺焉如師之教導焉
故人之于上也恭之如神明愛之如父母今或不然陛
下親近貴倖分曹建署補除卒吏召致賓客因其貨賄
假以聲勢大者統藩方小者為守牧居上無清惠之政
而有饕餮之害居下無忠誠之節而有姦欺之罪故人

之于上也畏之如豺狼惡之如仇敵今海內困窮處
流散飢者不得食寒者不得衣鰥寡孤獨不得存老幼
疾病不得養加以國權兵柄顯于左右貪臣聚斂以固
寵姦吏因緣而弄法冤痛之聲上達于九天下入于九
泉鬼神為之怨怒陰陽為之愆錯君門萬里不得告訴
士人無所歸化百姓無所歸命官亂人貧盜賊並起土
崩之勢憂在旦夕即不幸因之以病癘繼之以凶荒陳
勝吳廣不獨起于秦赤眉黃巾不獨生于漢所以為陸

下發憤扼腕痛心泣血也如此則百姓有塗炭之苦陛下何繇而知之乎陛下有子惠之心百姓安得而信之乎臣聞漢帝即位之初更制七十餘事其心甚誠其稱甚美然紀綱日紊國祚日衰姦宄日彊黎元日困繇不能擇賢明而任之失其操柄也自陛下即位憂勤兆庶屢降德音四海之內莫不抗首而長息自喜復生於死亡之中也伏惟陛下慎終如始以塞四方之望誠能揭國柄以歸于相持兵柄以歸于將去貪臣聚斂之政除

姦吏因緣之害惟忠賢是近惟正直是用內寵便僻無
所聽焉選清慎之官擇仁惠之長敏之以利照之以和
教之以孝慈導之以德義去耳目之塞通上下之情俾
萬國惟康兆庶蘇息即心無不達而行無不孚矣臣謹
按春秋齊桓公盟諸侯不日而葵邱之盟特以日者美
其能宣明天子之禁率奉王官之法故春秋備而書之
然則官者五帝三王之所建也法者高祖太宗之所制
也法宜畫一官宜正名今又分外官中官之員立南司

北司之局或犯禁于南則亡命于北或正刑于外則破律于中法出多門人無所指繇兵農勢異而中外法殊也臣聞古者因井田以制軍賦間農事以修武備提封約卒乘之數命將在公卿之列故兵農一致而文武同方以保乂邦家武遏亂畧太宗置府兵臺省軍衛文武參掌閑歲則櫜弓力穡有事則釋耒荷戈所以修復古制不廢舊物今則不然夏官不知兵籍止于奉朝請六軍不主武事止于養階勲軍容合中官之政戎律附內

臣之職首一戴武弁疾文吏如仇讎足一蹈軍門視農
夫如草芥謀不足以翦除姦宄而詐足以抑揚威福勇
不足以鎮衛社稷而暴足以侵害里閭羈紲藩臣干陵
宰輔隳裂王度汨亂朝經張武夫之威上以制君父假天
子之命下以御英豪有藏姦觀釁之心無伏節死難之
誼豈先王經文緯武之旨邪臣願陛下貫文武之道均
兵農之功正貴賤之名一中外之法還軍衛之職修省
署之官近崇貞觀之風遠復成周之制自邦畿以刑下

國始天子而達諸侯可以制猾姦之彊無踰檢之患矣
昔晁錯為漢削諸侯非不知禍之將至忠臣之心壯夫
之節苟利社稷死無悔焉臣非不知言發而禍應計行
而身僇蓋痛社稷之危哀生人之困豈忍姑息時忌竊
陛下下一命之寵哉是時考官左散騎常侍馮宿太常少
卿賈鍊庫部郎中龐嚴見黃對嗟伏以為過古晁董而
畏中官不敢取詔下物論罵然稱屈諫官御史欲論奏
執政抑之于時被選者二十有三人所言皆冗覲常務

類得優調河南府叅軍事李邵曰劉蕡下第我輩登科
能無厚顏乃上疏以為蕡所對策漢魏以來無與為此
有司以言涉訐忤不敢以聞自詔書下萬口籍籍歎其
誠鯁至于垂泣且陛下以直言召天下士蕡以直言副
陛下所問雖訐必容雖過當獎書于史策千古光明使
萬一蕡不幸死天下必曰陛下陰殺讜直結讎海內忠
義之士皆憚誅夷人心一搖無以自解況臣所對不及
蕡遠甚乞回臣所授以旌蕡直臣逃苟且之慙朝有公

正之路陛下免天下之疑顧不美哉不報令狐楚牛僧

孺節度山南東西道皆表黃幕府授秘書郎待以師禮

而官人深嫉黃誣以罪貶柳州司戶叅軍卒

舊書及通鑑皆云終

使府御史恐未核

及昭宗誅韓全誨等左拾遺羅衮上言黃羅

譴逐身死異土六十餘年正人義夫切齒泣比陛下

幽東內幸西州王室幾喪使黃策早用則杜漸防萌逆

節可消寧殷憂多難逮及聖世耶帝感動贈黃右諫議

大夫訪子孫授以官云邵字子玄後歷賀州刺史

欽定續通志卷二百六十九